

四庫全書

集部

欽定四庫全書

雪坡集卷十

宋 姚勉 撰

賦

秋懷賦

天時倏兮如流西杓揭兮復秋露零零兮蘿薜風嫋嫋
兮梧楸草蛩淒兮夜弔夕陽亂兮蟬愁嗟物理兮若此
焉人情兮銷憂想征夫兮天涯歲月悠兮未歸懷故鄉

兮千里羌目斷兮魂飛悵思歸兮閨中罷膏沐兮飛蓬
角枕粲兮衾爛耿獨夕兮誰同夕風起兮淒淒瞻大火
兮流西氓蚩蚩兮多寒歲無褐兮疇衣棗纍纍兮欲丹
寒苦早兮陰山哨騎肥兮將馳兵何時兮戍閒節物驟
兮駸駸日復日兮秋深幾何人兮悲秋羌獨集兮予心
微無酒兮以遊酒莫銷兮此憂彼其子兮不知覆謂予
兮何求嗟時事之日非暑已退兮寒淒嘉禽逝兮鷗擊
蕙蘭摧兮蒿肥簷雨兮浪浪寐復寤兮宵長西風兮鴈

行梗泛泛兮異鄉望家山兮飛雲明月思兮故人我不
如今季鷹思鱸魚兮羹蓴孰有山兮可耕孰有溪兮可
釣願從子兮是問一登臨兮長嘯

蘭國賦

為左
氏作

孔素臣之苗裔兮厥鼻祖曰丘明謂蘭有國香兮載於
傳感麟之經耳孫有味乎斯言兮爰嗜蘭以為朋若靈
均之在郢兮蛻衆濁而獨清夢天與己國兮以蘭而為
名其封疆雖不越夫九畹兮塞宇宙而皆馨試周遊其

邑都兮芳菲菲其若英繚夫容以為池兮扈江離以為
城建薜荔而為門兮合百草使實庭蓀壁桂棟兮菊椒
成堂辛夷為楣兮葍之為房芷葺荷蓋兮櫟之杜衡戶
素枝而赤節兮家綠葉而紫莖天氣如春二月兮光風
泛其載榮又如秋之云初兮露瀼瀼兮朝零人好脩而
信姱兮俗嚮清而面汙久而不聞其香兮若居夫沅湘
與澧浦荃為之君兮蕙之為妃杜若為之大夫兮菊為
卿以相之君子衆芳之所萃兮紛揭車與留夷資菘菀

不使盈室兮屏莛椹而不使充幃服蘭衽之芬菲兮結
蘭佩之陸離焚蘭膏以為炬兮蘭藉烝以為靡啓蘭宮
而擢秀兮闢蘭省以儲材演綸言於蘭坡兮萃緗帙於
蘭臺士同心而如蘭兮斷金其利民化善人之蘭室兮
無薰染乎鮑魚之肆芳草不為蕭艾兮荃蕙不變而為
茅惟以蘭為可恃兮匪薰猶之混淆鼓蘭柅於江之湄
兮擁蘭旌而在郊朝馳馬於蘭上兮夕弭駕於蘭臯人
間乃有斯國兮無一蔓之穢雜雖壤地之褊小兮可并

包乎六合於茲焉且止息兮憺清興其安窮條蘧蘧而
形開兮乃得之於夢中寐既寤而復思兮欲彷彿其遺
跡乃種蘭乎丘園兮重之郊圻之申畫遂開國於茲土
兮奄其疆域加千本為食邑兮餐風晨與露夕亂曰以
蘭為國兮蔓草必刪願移之吾國兮徧國中而皆蘭為
國之道兮種蘭乎觀

梅花賦

壬辰之冬雪霽寒麓有二其客訪我梅屋炙晴窻之新

暄酌瘦樽之清淥值余梅之暖吐巧裁鏤乎冰玉出臞
僊於山澤揖處士於巖谷微風天落暗有清馥幽閒淡
雅照水橫竹客謂主人曰天英地華融為百花或以香
珍或以色媵觀其爭麗而奪秀蓋亦千芳而萬葩何吾
子之皆不取而獨內交乎斯梅耶主人顧客而笑曰養
竹于庭所以標醉吟之清滋蘭在畹所以風靈均之馨
君子好恬而樂素不羨侈而慕榮桃李華而近浮松栢
質而少文未若斯梅之為物類於君子之為人今夫異

萬木而獨秀冠羣芳而首春是即君子之材拔衆萃而
莫倫立清標而可即正玉色以無媚是即君子之容羌
既溫而且厲寒風怒聲悄無落英嚴霜積雪敢與爭潔
君子之節也瑤階玉堂不增其芳竹籬茅舍不減其香
君子之常也在物為梅花在人為君子皎茵璧之連接
瑩壺冰其表裏既物我之通稱又焉得舍此而取彼茲
予所以內交於斯梅而植之以為庭實也方其林梢盡
枯瓊萼孤出霜風肅肅庭有愛日負朝暄于檻砌而緇

玩乎書帙此時此花味我閒適又如殘雪在簷寒月侵
室浮雲四卷天宇寥閒倚欄干而長嘯遇神人於姑射
此時此花助我飄逸嗟吾屋之半間陋纔止於容膝惟
此花之清絕相娛笑以朝夕開醉襟於酒觴生妙思於
吟筆使予舍此而他好殆將喪志於玩物矣况夫若作
和羹爾惟鹽梅味可世資從古以來方將薦實於鼎鉉
豈徒脫跡於塵埃彼百花之紛紛亦何有於我哉客聞
此言色笑心悅挹清芬而度酒嚼瓊蕤而嚙雪醉相枕

而不知同一夢於霜月

嫉蚊賦

顧余宅之近市兮既湫隘而囂塵值炎夏之蘊隆兮加
倍蓰之熒焚夕余冀其小紆兮復擾予以聚蚊風箠倦
于長驅兮煙烽煩于屢薰曾一寐之不遑兮羌雜揉而
紛紜予也中夜以興振臂拊髀而長嘆曰嗟哉黍民眇
然汝形喙纖銳其鍼利翼浮僂而絮輕不爽處于高朗
之區而潛伏于奧僻不顯行於大明之晝而竊出於昏

冥大之不能如虎豹之怒以戕人之生也次之不能如蛇虺之螫以傷人之形也顧所求之幾何特血肉之微飽曾奚足以害人酉營營而至卯蓋類乎無所能之小人徒聚其力而為君子之撓若乃熾日方夕餘暑未收體倦氣呀珠汗雨流敲枕風櫺庶幾少休乘日入而慝作大呼類而嘯儔閔焉如雷滄然如霧趨炎附熱蔽牖蒙戶忍長日之枵腹謀一食於向暮遇裸程而不為免吮痂癬而不為汙陰肆毒而中傷慘有甚于膚慙方睡

睫之欲交忽奮拍而驚寤左方驅而右集東忽散而西
聚盈耳根而鼓譟藹萬口之和附羣攻競齧多不知數
飢無所擇飽不能去纍纍紅粒滿壁羅布襁童驚泣竈
婦嗔怒呼燈就爇隨觸隨仆曾不為之加少羌難得而
驅捕受其患者居多極人情之同惡爾其風榭豪室冰
館貴家簾紋凝水厨冪護紗無纖隙之可入雖一喙而
莫加何葦門而陋巷爭鼓吻而搖牙彼蟲類之齧人固
有蚤而有蟲或傍綠而肆侵或跳梁而逞黠然皆緘口

無聲潛伺竊發獨爾蚊之可憎翁喧譟而強聒如自鳴
其得志曾不思其苟活此其為患之最深而國人皆曰
可殺者也予又重哀之曰嗟嗟汝蚊何役役兮形則
微眇志戕賊兮乘時炎熱投間隙兮晝伏夜動謀血食
兮羣聚成雷聒終夕兮維爾之故不能息兮欲粉汝形
特一擗兮煙烽火燧矧可彘兮仁心愛物微亦惻兮汝
寧擾我不汝敵兮物盛必衰不可極兮今勢雖張後則
衰歇兮秋風掃除影滅跡絕兮

戰蟻賦

蟻之有生微軀眇形穴居蠕動為蟲之靈禮克辨於尊卑智能卜乎晦明羣慕羶而沓集各銜粒而經營語其義則感恩而穴犴言其勇則萃力而制鯨合庶彙以概觀亦有能之可稱何弗安乎性分乃從事於戰爭若乃柱礎潤流濃雲鬱興潢潦慮及丘垤思升授丘於審雨之堂整旅於檀蘿之國列行五而序進勢有類於征役數越千萬隊分什伯黍民肆騰翥之勇玄駒逞奔驟之

力初曼衍乎牆隅旋圍繞乎砌側登爽塏以屯集養鋒
銳而待敵緣堦歷坎負塊依石若創營而立壁也交持
競鬪以力相格若陷陣而縱擊也弱者散驚强者攻克
若追奔而逐北也利吻如鉗各銜所獲若獻俘而斬馘
也方且圍戶之前入穴之隙軍拔幟而漢勝師館穀而
晉食墮沙礫之樓觀空羶穢之儲積乃整衆而還歸類
志滿而意得一寓目而觀戲吾重為之太息使殷師聞
之必以為牛鬪之可駭而蒙莊觀此豈獨哀蝸戰之不

釋耶嗟夫太僕既分百偽斯動逐利隨欲鬪智角勇弱
役於強寡奪於衆迭相憑陵日鬪而鬪雖以蟻之至眇
亦紛拏而總總又孰知夫擾擾之無益而南柯之為夢
耶是不獨蟻之為然也天下之區區何以異於蟻穴之
微人心之好競何以異於羣蟻之知相古先民鞠旅陳
師蓋欲戢乎暴亂非樂耀於兵威奈世道之日遷異往
聖之所為韓白騁其巧孫吳奪其奇驅萬姓於鋒鏑爭
一戰之雄雌竭民膏於中國要邊功於外夷財力既凋

憂患乃隨鑿在邇而弗悟轍既覆而尚追安知教修而崇服德敷而苗歸蓋亦曰佳兵者不祥之器聖人不得已而用之

宜堂賦

為張倅作

魯丘稱好賢之詩兮曰如鄭之緇衣惟周司徒之善於職兮國人美之而曰宜適子館而授粲兮衣苟敝而又改為邈千載而誰嗣兮乃復見於此時粵高安之勝區俗清熾而易化乃以從遊赤松之仙人而為平分風月

之別駕居無何而政成思欲樂其閒暇爰啓新堂以宜
字之騁椽筆而成記發江山之潛輝有龐者眉左扶右
携來觀厥成載笑載怡私問于公之客曰宜堂之名何
居其此堂之宜我公乎抑我公之宜此堂乎顧天衢之
方亨兮展驥足于千里決非如休亭主人所謂之三宜
也又非如竹樓使君所記之六宜也以宜字堂厥有其
義客如知之願為父老言公之意客曰叟不讀公之記
乎公之意在於爾民而樂事其寓也故其為堂也不雕

其楹不峻其宇席可函丈室如環堵寓意於鼓琴弈碁
之間而意不在於樽俎托興於賦詩吟嘯之時而興不
在於歌舞故能無所往而不宜而斯堂也亦真宜行樂
之所是故煙晴景明花菲柳紫則宜於春翠陰鬱蒼水
壺晝涼則宜於夏風露鮮霽則宜於秋之晨雪月爭清
則宜於冬之夜焚香讀易則宜於自公之餘品茶評詩
則宜於對客之暇頌聲溢清水之庭訴牒稀蔽崇之舍
此宜堂之無所不宜者也况夫鄰碧落之洞天對蓬萊

之絕頂荷山自獻其萬狀錦江橫陳乎千頃揖安期於
九霄吸流霞之八景宜騎氣而馭風而游于方壺圓嶠
之境又不特製菡萏於劍池酌清冷于丹井也宜之義
大矣哉孰為之宜蓋有其故鈴閣無有蠅之嫌寮幕深
詠魚之趣全芒刃於解牛微捷徑之窘步此堂之所以
為宜而斯名之所以無負也言未已父老欣然而笑曰
宜之義知之矣而斯堂則豈公之所宜乎我聞佩僊花
吟紫薇時則有白玉之堂列三槐植九棘時則有中書

之堂公之所宜盍宜於此而豈止宜於分雌堂之半席乎客以為然遂從而歌之歌曰

公作新堂是名以宜可以飲酒兮可以賦詩攬風月兮無邊樂朝暮兮四時身軒冕兮志丘壑匪堂之樂兮樂民之樂時和歲豐兮民物阜康公領嘉客兮來宴斯堂撞鐘兮擊鼓鼓咽咽兮醉言舞祝公眉壽兮俾熾而昌公宜天下兮豈止宜於此邦抑公之宜兮奚堂之居匪槐堂之位則玉堂之廬

雪坡集卷十

欽定四庫全書

雪坡集卷十一

宋 姚勉 撰

詩 七言絕句

春日即事

梁燕無聲半掩闌
晝長人靜覺春閒
閒中却有農歌起
聲在晴煙綠處山

花下聞鶯

吹花不起午風輕
懶絮閒絲颺暖晴
詩料滿前收不盡
海棠花下又聞鶯

催海棠二首

燕子銜春已幾時
嫣然未見茜紅枝
天開錦幄烘晴晝
着力東風一夜吹

把酒叮嚀蜀海棠
睡紅何似未忺粧
不嫌老杜吟無句
定為淵材恨少香

海棠一夜為風吹盡三首

翠底紅嬌得幾時不甘飛動雪臘脂問天借醒書窻眼
為報東風且慢吹

不作天開錦幄紅却成急雪舞回風多應欲襯吟春步
綉出香裯展暎中

海棠自是百花僊霞袂霓裳下九天昨夜詔歸紅玉闕
但留翠幄鎖晴煙

海棠落盡葉間猶見數花

狼藉吹花一夜風錦裯織就錦機空葉間尚有餘春在

深處嬌藏四五紅

花障

綠外穠黃白外紅一屏香錦立春風
天真步障豪華敵借與王家賽石崇

綠陰

紅滿芳蹊綠滿叢未須惆悵怨東風
綠陰正耐經秋看
不比花纔十日紅

晝步江村

碧空一片水雲飛
竹裏人家午唱雞
江路雨晴芳草潤
杖藜行遍水東西

山中

俯掬清泉漱齒牙
仰看日照山花
山中閒趣誰能會
更過僧房話午茶

豫章道間

平疇雨過稻花香
草木風前舞翠光
天意知儂今日出
先期一夕薦新涼

書塘浦橋壁

密邇松楸彩霧開
卧龍行矣起春雷
大揮椽筆剛題柱
即日高車駟馬來

題桂籍

年來文物盛江西
捷幟聯翩報錦溪
好把香名題此籍
此題已兆杏園題

廷唱日待漏麗正門

觚稜片月影將西
鵠立宮門待啟扉
驕馬似龍旗似雨

不知誰是狀元歸

鏡齋相士求詩二首

鵝袍待對滿京華
剛許癯儒作探花
性淡不知花可探
班頭獨立紫宸衙

人間鏡是無心物
物到皆知醜與妍
欲得一雙如鏡眼
中書堂裏坐搜賢

贈賈相士

相見湖山記昔年
吟肩坐簷聽寒猿
祇今面目何曾改

自序
卷十一
剛被人呼作狀元

謝田賢良送蓮藕

京陌塵埃渴肺腸
藕蓮分惠帶湖香
羨君一葉穿花底
醉吸荷筒月露涼

遊湖

雲錦香中着艇撐
煙霞高處步筇登
寺逢好處都遊遍
身似西湖過夏僧

玉井亭觀蓮

幾隊紅粧擁蓋青凌波
僊子立娉婷晚涼孤坐香風裏
如在西湖四望亭

題江山風月樓三首

明月清風不用錢
謫僊吟思浩無邊
此清若也錢能買
金谷人須勝謫僊

江上清風月在山
葉舟赤壁蛻塵寰
坡僊心事君知否
不取一毫天地間

風月江山自四時
个中誰識活天機
會渠結峙融流意

方解吟光弄霽歸

題梅谷詩藁

不與春風落世間
萬山明月雪漫漫
谷中更有人如玉
招隱不來清夢寒

丙辰冬和樂魁聲道四詩

蘭芷懷思未敢言
美芹良欲獻君尊
八珍側畔堪容得
虎豹狺狺踞九閭

白柄長鑱曉入山
欲尋黃獨駐君顏
雲深路晦東風雨

惆悵空携竹筇還

龍堂魚屋悵君歸
桂楫荃橈蓋九芝
望斷碧雲天愈遠
美人南浦竟安之

時節驚人欲折心
空塔片葉又秋侵
燕歸鷓止渾閒事
只恐山寒雨雪深

雪中雪坡十憶

近水新栽一卷梅
而今雪裏想齊開
只愁夜後花幽獨
誰與携筇踏月來

金
卷十一
此君應似舊平安瘦節森然耐寒萬葉瓊瑤光照眼
夢披鶴氅倚欄干

礪砢擎雲十丈松水髯不剪照瓏鬆曉窻明眼山前雪
猶似巡簷看玉龍

對床風雨飽曾聽聽雪敲窻更自清舊日擁爐聯句樂
而今欹枕打篷聲

近郊勝處小雲居一水如龍湊佛廬長記釣蓑披雪去
磚爐溫酒煮溪魚

倚空銀管立嵯峨
看雪湏登宰堵波
一覽瓊田三萬頃
分明掌上見山河

冰襟玉袖幾交遊
儘自風流勝子猷
有興可乘應不盡
定無門外便回舟

萬箇琅玕遶舍青
風聲相和讀書聲
蛛絲近日應侵几
孤負虛窻照雪明

帳窄銷金舊党家
未知清處在煎茶
便應歸去燒松葉
細碾槍旗煮雪花

欲折梅花寄故人
驛無來使草成茵
輕風細雨分寒暖
已是江南數日春

題雲窗

詩材無限思無窮
歛在唐人四句中
叅透此闕猶細事
作詩知道始為工

贈畫師二首

虎頭筆法得來親
佳士相逢必寫真
今代英雄良不少
未知誰可繪麒麟

曾藏天巧錦雲梭萬象都收入網羅只作蟲魚非磊落
安排手筆寫山河

贈石工二首

削玉裁成巧自然雲根水骨更無堅不知可助媧皇否
補取人間缺處天

禹世龍門巧鑿人傳來心法妙通神倩渠斷取擎天柱
撐拄明堂億萬春

章鈞僊吹鐵笛善醫眼與齒相說法尤高

卷十一
穿雲裂石笛聲秋興在江湖一釣舟貫柳無魚囊有藥
直釣應是太公釣

嚴於治齒要如軍治眼當如愛護民此術儘堪為世用
釣魚船上豈無人

眼眇書冊隱廬蝸律論誰聽落齒牙說起元龍湖海志
扁舟又欲出蘆花

贈吳相士二首

不分麀頭愛虎頭世間能有幾封侯何如靜去修天爵

此貴人人可得求

盡道狐裘勝緼袍誰知富貴只鴻毛急流若使真能退
不作神僊更自高

贈高眼陳相士并序

天下有兩等眼一俗眼一具眼具眼識人於未遇
方窮而知其達俗眼窮則毀之達則譽之者也豈
惟世人凡以卜相名號為能知人者其眼亦徃徃
而俗窮也則曰子未可問舉第既達則曰吾嘗許

其舉許其第窮達各一舌是何號為知人者亦若是邪獨陳高眼者則未然方丙午秋榜將揭高眼謂予曰子虧籌可惜予時頗忿其言越明日榜揭予與胡英甫皆自正榜出而亞方驚異其虧籌之言有詩遺之已酉其說復爾亦驗今秋高眼至予迎謂之曰予今無功名妄想矣子非再來以虧籌相語乎偕坐而笑高眼睥睨良久謂予曰子今雖不虧然亦虧舉首矣今年春秋作解頭吾已屬之

他人子當詩賦薦予亦未甚信其語越旬日榜揭
予春秋卷果失利僅以詞賦為第二解頭春秋則
予畏友胡季弼也夫許人薦易許以某經薦難乃
果如其言豈其嘗以舉首許季弼故不復可以諛
我姑以詞賦薦許之遂幸中耶抑真有所見耶以
丙午己酉之言驗之則真有所見亦若可信高眼
言既驗復來索詩予問其丙午之詩安在則壞爛
於醬缶間久矣不復有矣窮則棄其詩達則復索

其詩高眼亦轉而俗眼耶予所喜者不喜高眼今
日諛我之言獨喜高眼前日不諛我之言予之心
無窮達高眼之眼不當有窮達然後高眼益高而
俗眼自俗予不復作詩恐他日復為所棄高眼曰
子明年且上第他日見吾將以錦軸裝詩進矣予
笑曰世間有是人耶眼雖不低俗不可醫乃賦吾
庭前之梅以清其俗詩曰

請君着眼相吾梅自是羣芳合遜魁但有一般難相處

玉堂也似竹籬開

再贈

癸丑十月

黃金在手亦能揮，爭奈無錢自忍饑。
未得酬君錢百萬，且先持此一篇詩。

高眼執去秋筆帖來取相錢驗之，是醉狂時所書。
高眼之言則驗矣。予一窮入髓，安得有錢百萬以
償相債耶？輒效顧虎頭施財例，以詩予之。諺云一
字直千金，一金漢法一斤金也。此詩二十八字是。

亦二十八千金矣高眼笑曰其如字不堪煮何

贈尋賢相士

三載須尋一狀元難尋却是狀元賢近時橫浦梅溪老
方是人中第一僊

殿直求賦狀元遊六街詩

玉絲鞭裊散天香十里欄干簇艷粧但念君恩思報稱
懶騎驕馬過平康

離京留題蔣店

閤門傳旨放朝參
歸覲親庭曉整駢
葵藿丹心猶戀戀
五雲繚繞望宮南

瓊瑤為室玉為臺
隔岸羣花照水開
莫道此樓容易上
天香曾到此中來

宿珠橋見龍上天

升天舊說有神龍
今覩蜿蜒在目中
莫道已騰霄漢了
願施霖雨作年豐

贈李樞幹三首

身方否極當如泰命到通時亦似窮此事揔皆由自己
算來都不屬天工

盡道掄魁世所榮誰知須要似王曾鳳池身到渾閒事
如董如何豈足稱

富貴功名不足誇肯將一第博榮華春分正欲均天下
何必長安看盡花

贈達齋術士二首

昔年甕牖讀書時誰許蟾宮第一枝今日誤恩纔入手

便來爭說鳳凰池

鳳凰池上亦何榮
道義曾知有利名
達則春風天下共
窮時曉雨隴頭耕

贈呂南叔談命二首

開口談天數似麻
向人諂笑詫榮華
惟君說命能窮理
說到精微別一家

龍首皆求到鳳池
此心只為利名馳
吾儕所志惟天爵
厚祿高官揔不知

再贈尋賢相士二首

逢人說相不求錢
春色湖邊一醉顛
眼法自高人幾者
不尋富貴只尋賢

姦蔡邪丁兩貴臣
目光不瞬漫精神
相師若有尋賢眼
莫看包羞祿位人

再贈陳高眼二首

高眼先生本姓陳
閱人多矣妙通神
地爐傳得麻衣法
恐是希夷身後身

狀元出應河連識人說先生相法真更有河連丞相出
不知高眼屬何人

贈蔣儒宗筭星辰

省破浮榮醉色醒如貪青紫豈明經只煩君把天機泄
四海如今幾福星

贈張山人談命

等閒客裏捧茶甌說到人間第一流
北上遺編今在否
異時來問赤松遊

贈古鑑相士

以古為名便異今况能有鑑照人心
舊聞古鑑知興替
借與清朝獻六箴

贈趙碧眼相士

李白唐宗英也能識郭汾陽
今趙明叔亦天姓
乃能知斛峯李先生
當世第一流
人物也能知之
賢於識汾陽矣
敢借斛峯先生韻送之

拂袖蓬萊羣玉峯
伊人不可遯
游蹤煩君喚起
山中睡

為說蒼生渴雨龍

贈天台相士

龍榜鳳池俱細事十年身到待何如
問天乞取百年活圖得山中飽讀書

贈鄒相士三首

浩蕩狂風晝雨霾燥田渴雨欲生埃
煩君為覓為霖手傾倒天瓢澤九垓

玉帳元戎過福州誰擔此擔向邊頭
中宵敲枕難成寐

底道儂無隔夜愁

人生有子萬事足不問官稱有與無老子希文何事好
踏渠脚步得堯夫

雪坡集卷十一

欽定四庫全書

雪坡集卷十二

宋 姚勉 撰

詩 七言絕句

題小西湖

主人曾次一西湖
新展蘇堤小畫圖
待種梅花三百本
請君雪裏訪林逋

再題小西湖

和張琦韻

閣前白倚竹扶踈梅似逋
僊柳似蘇待向山椒結茅屋
更添偉觀占江湖

深深晴日漲湖煙
開着蓬牕飽看蓮
只怕客來童放鶴
又催花裏棹歸船

記得臨風玉樹前
聽詩長愛思飄然
肯來重結鷗盟否
新有湖亭八九椽

題惠政橋

生愁杜宇叫津橋
叫入南人贊
眠朝安得砥流如此石

康衢日日聽童謠

題藍橋

芝堂自瑞天朝宋竹郡久更江左唐願似誠齋詩句說
朝京舊路再筠陽

題長沙鋪

君向長沙驛舍來驚心此路想遲回漢庭賈傳曾還否
風撼空山葉欲堆

題左國寶後村

桃李隔牆花滿園
卯君曾此賦東軒
祇今左氏莊如許
恰在東軒近後村

題胡景顏雙清堂

盤桓松菊陶元亮
俯仰山泉白樂天
長謂若人無復有
後身却在石溪邊

題靈溪道旁水閣

一碧無波湛淺溪
釣舟已繫打魚歸
碧山黃葉排如畫
中有聯翩白鷺飛

題崔莊庵壁

碧潭見說有龍蟠
萬里滄溟氣欲吞
此去風雷轟蟄起
大施霖雨霈乾坤

筆峯秀聳帶溪縈
人傑當知是此生
說與山靈須借助
從今姓字達天京

題月巖

巖影嵌空月欲圓
天風吹動碧雲端
到天一半已如許
真到廣寒應更寒

題松風閣

萬松排立撐雲表
虛籟生風秋月皎
了翁安在不可呼
雪鶴飄然下林杪

題鵲巢寺

脩竹蕭森影過墻
屨聲寂不響
回廊道人獨坐清
無對飽殺薰風一味涼

孤山納涼

雙鷺窺荷弄水香
一蟬嘶柳送斜陽
京華涼處惟湖上

更有孤山第一涼

遊冷泉亭宿四聖觀

晝日追涼到冷泉
晚風呼酒醉湖邊
醉中興懶休歸去
試叩丹房借榻眠

題四聖觀小蓬萊

湖光平接碧天開
浮世笙歌下往來
箇是蓬萊真絕頂
如何只道小蓬萊

四望亭觀荷花

面面湖光面面風
可人最是白芙蓉
分明飛下雙雙鷺
纔到花邊不見踪

孤山聞木犀

湖面清風拂酒盃
異香一片自天來
明知不是荷花了
金粟漫山昨夜開

木犀

絲絲朝雨濕牕紗
薄日疎雲弄霽華
可是都城秋事早
新涼更有木犀花

賣花擔上買秋光分貯冰壺沁曉涼
滴取露珠供硯水
筆頭已覺帶天香

蕊餅對貯碧金叢萬斛香藏一粟中
侵曉起來清馥滿
夜來真睡廣寒宮

芙蓉

水芙蓉了木芙蓉湖上花無一日空
卷却水天雲錦段
又開步障夾堤紅

遊下竺園

穿洞拔巖日幾回瘦筇欲去復徘徊園丁亦怪經行數
笑道今朝官又來

九月十日晴

簷雨牕風隔夜秋曉看天宇忽雲收菊花尚在仍佳節
未必今朝蝶已愁

九月十三日飲湖上

閉門十日厭塵埃纔見湖光眼便開最愛平堤楊柳外
幾舟撐去幾撐來

別西湖

別了東坡更樂天重來薦菊又明年欲行且止真難去
再泛西湖半日船

漸是梅花雪片時鴈書底苦趣歸期雖然未賞西湖雪
猶及梅花第一枝

道中即事

路盤山行崖挿天儂行山頭下有船逆船上遲步行速
舟人指儂誇為儂

霧氣瀟濛水氣蒸上與寒日爭昏明江心有船不可見
惟聞咿啞搖櫓聲

霜融霧消又作晴四山日氣烘春明黃葉如金紅如錦
枯梢無葉更覺清

心馳家山恨不飛兩旬欲作一日歸征衫尚絺未足苦
天寒親老未授衣

蕎麥花開如雪鋪新霜寒早半欲枯故山今年熟此否
讀書夜飢需餅爐

誰家玉雪花嬌兒頰足嬉笑牽爺衣韓家阿孛今已矣
有誰門前迎我歸

天晴日短亦覺長客行一日兩舍強道傍蕭蕭木葉下
天風又辨明朝霜

橘纍金印楓錦衣夾路相照生光輝我非買臣與季子
但有菊佩芳菲非

我亦欲懷三赤珠陸郎有母繫獨無治生復無人諫止
亦豈能有千頭奴

怪梅蟠屈如龍蛟
小紅如粒欲作花
雪坡一株恰如此
歸歟月明看橫斜

道傍紡女

道傍女子雙髻鴉
兩足如雪踏紡車
村莊人家只如此
齊宮步步生蓮花

贈陸伯容

掛琴無壁一長吁
可是儒冠竟誤儒
好把清波回涸轍
莫教白眼哭窮途

陳明卿覓瓦蓋屋

玉川幸有數間屋子美怕卷三重茅為君覓費易陶瓦
夜牕寫詩聽雨敲

早起觀雨餘蛛網

嫩涼催讀矮牕書曉色初分恰雨餘莫笑頽簷無活計
四邊寶網掛真珠

七夕分韻得絲字

柳子中庭乞巧時始知抱拙不汗卑向令早似愚溪日

未必緇塵湮素絲

題蜀江觀

漢中元元年光武中興三十有四年也是夏洛陽
醴泉湧出飲之者痼疾皆愈自建武數至中元三
十二年然光武興於更始元年尚有二年也寶祐
丁巳上即位亦三十四年矣瑞蜀江觀靈泉復湧
功與漢泉等先是淳熙十二年曾湧觀以是建今
復湧是吾君聖德昭天漏泉軼漢光規孝祖也不

然何此瑞復見瑞之陽乎維時先臣某嘗歌詠之
矣某不肖逢今昌運詎敢默然謹拜手稽首而作詩

光武中興三十年愈民痼疾發靈泉吾皇何止如光武
瑞井宜通瑞錦邊

孝祖淳熙極盛時此泉曾發蜀江湄綉衣酷吏雖湮塞
難掩公朝賜石碑

飛昇千載許旌陽一念吾民尚未忘循吏儻憐民疾苦
開泉療疾又何妨

幸喜甘霖做歲豐靈泉又奏濟人功但令姦猾銷聲好
莫禁民躋壽域中

題嚴子陵釣臺

倡周節義有夷齊釣渭鷹揚可太師西漢頽波無砥柱
先生只合一綸絲

扁舟誰不過嚴灘喚醒貪夫醉夢寒名教扶持真百世
豈徒當代懾曹瞞

封了全燕不復臣友朋從此廢天倫子陵不為光皇屈

要識君王有故人

懷仁輔義戒阿諛萬古先生兩句書長往不來安有此
始知王佐在樵漁

除夕前一日湖中望西山有感

西山青處近家鄉先世衣冠正此藏明日千門俱祀歲
墳前誰拜一爐香

思江南筍蕨

先生亟去理山齋筍蕨春甜味正佳一夜東風催變綠

筍吹成竹蕨成柴

贈陳龍湖

蜿蜒寒碧捲深清
一洒甘霖澤萬生
此際莫驚蟠螭好
近冬時節不妨晴

題王昭君

謝却君恩入塞塵
宮花從此不能春
丹青莫恨毛延壽
婁敬先為作俑人

送周縣尉

卯月
滿秩歸

清浮寒露在水壺一節三年更不渝莫道來時琴鶴在
而今琴鶴一齊無

采棒年來可怕人先生一念只慈仁吏奸却立晴水曉
民瘼皆甦化日春

鄉戶生愁役破家買田助義息紛譁從今閭里皆安業
男課犁鋤女績麻

自古高安欠學宮新庠贊立竟誰功青青子佩爭絃誦
總在先生化育中

方今天下少貞廉廉有如公豈暫淹見說東皇思柄用
姓名已向玉瓶拈

送京學林申甫

京庠林申甫余舊同舍生也庸齋先生趙端明嘗
為書小隱堂四大字申甫復欲余書既有先生
銀鈎鐵畫在前後學不敢僭也姑各賦之詩

林飛倦翼已知還小隱何妨且住山未始便為長往計

回頭魏闕五雲間

右小
隱

萱草忘憂底解忘慈親鶴髮坐高堂美君有此忘憂得

如我添憂萬斛強

右萱堂

送歐陽

應夔

瀧岡六一先生鄉也舊有祠中廢弗葺應夔請於
郡興之是可嘉尚索詩為賦

祠宇重修復舊觀喜知家世未灰寒祇今陛下如仁祖
安得先生作諫官

寄題章貢劉氏麗曉樓

玉虹翠浪雪堂詩底事山光曉獨竒
看取陰雲都捲處
直須天下大明時

題梅莊郭成甫瘦吟帙

倚着梅花讀瘦吟
冰章雪句照人心
未應只為吟詩瘦
且占春風笑上林

梅似臞僂瘦為詩清寒直欲不勝衣
吟成雪裏調羹句
此句却令天下肥

小漿題壁用趙信國韻

雲脚崢嶸日欲西，釣舟箇箇泊前溪。
客牕不寐君知否，枝上饑烏夜正啼。

踏梅聊爾過江西，月裏漁竿冷插溪。
料想故園春事好，亂花深處聽鶯啼。

菊節宿白沙次友人韻

野市難為側帽紗，家山猶遠雪鷗沙。
退之尚有衣堪準，悔不留君醉菊花。

贈李森幞頭

冠幘非古也然所以莊其首則亦古意京師工此製者甚多獨真李官人為第一求詩為賦之

如龍驕馬出東華競指橫烏席帽遮盡道李家模樣好
竄宜頭上帶宮花

贈施大夫履鞋

漏院穿霜聽徹更催班影踏禁花行不須更待尚書諫
聽履先知有直聲

贈劉仲圭占牌

書銜莫羨一條冰
美職高官不足稱
何事只存天爵貴
令名長與日俱昇

天巧都存篆刻中
得君刀筆即榮通
鳳池誰信曾三入
闕吏猶猜八十翁

張道夫惠大小硯五走筆戲謝

蛾眉五硯列牕前
漬墨磨丹總可憐
試向鶯鶯主人問
大鬢何似小鬢妍

贈敷上人遊五山

拄杖挑雲過五山無心出岫倦飛還參禪未用多行脚
道在如如不動間

贈煜上人石牕

八牕本體自玲瓏鑿石為明更不同遮莫獼猴常應外
直須蟾月鎮當中

寄感山二詩僧

到感山尋雪山樵詩僧不遇寄以詩又入旃檀寮
中見几上有江南麥詩問誰作乃有如是佳句衆

以真半顛對問居何地則云南峯王月莊云是嘗
欲見余說詩者雖未識亦合寄以詩

欲聽茶鼎轉風松底事雲房白晝封應在山中採樵去

雪深何處問行踪

右寄
雪樵

讀君桑葦踈籬句
知得猶存用世心
拄杖借將來解虎

不須深卧白雲深

右寄
半顛

江南麥詩欲改一字謾錄于後
江南麥似草離離
哨騎貪青隔岸嘶
驚得村翁無計較
旋樵桑葦縛

疎籬元本是多計較改作無字覺尤有味顛以為
如何

贈僧雪翁

雪翁來覓雪坡詩冰雪相看太絕竒一片紅爐參徹了
梅花香透玉橫枝

丙辰祇召入京道信州題一杯亭

山行頗覺興悠哉到此何妨飲一杯爛醉不須愁世事

明朝醉醒又愁來

趙福王飲
一杯於此

南臺

福王
所建

一片荒碑立翠苔空餘基址鬱崔嵬此臺湮廢渾閑事
山北如今未有萊

跨鶴臺

唐時有僊人于
此跨鶴昇天

僊人白日上青冥鶴去臺空喚不應千載令威歸得否
雪堂有客夢如冰

寄題茶山

汪玉山為大魁後
從曾茶山學于此

文獻風流想故家玉川室邇已人遐何時細賞文清竹

與客同煎陸羽茶

文清公有
手植竹在

題祥符寺

鐘樓前有古
木可三百年

山在雲間幾上梯
竅高緣有福王祠
尚憐不及樓前木
得見祥符極盛時

贈長老洪野衲

舉目茫茫宇宙間
畏塗險甚太行山
鑊湯隨地無冰處
只有僧廬野衲閒

洪長老惠藤杖

高僧挑月一枝藤，惠我登山脚便輕。
瀕洞風塵豺虎惡，從今險路穩支撐。

松江買魚不得詢之，則前此多為官船所強取，故有亦言無因成三絕。

江行安可食無魚，問着笊箸總道虛。
底事官船渠不賣，從來污吏喜侵漁。

分明翠籠掩金鱗，鼓柁飄飄不可親。
底事官船渠不賣，官人不是愛魚人。

人間到處有魚羹我亦扁舟柳下橫一任官船渠不賣
歸歟繪玉煮深鎗

過麻子湖遇逆風有作

我自甘心欲背時舟行一任逆風吹去帆今日誇輕捷
只恐前灘也怨遲

自喜扁舟載月明涉湖底事不宜輕象痕深沒風仍順

今日天公亦世情

時見有自吾州解官歸者數船滿載且遇順風

來去船皆欲便風天心豈解兩相從儂帆一順渠應怨

不若從渠且苦儂

茲行已誤出山來得就尊鱸亦快哉造物莫嫌歸未是
故教風力倒吹回

世道如斯決意歸此心不怕八風吹吾生忠信無休日

天下風波有定時

時丙辰
十二月

次鄒希賢買魚不得三首衍為漁翁問答六詩

問漁翁

撥刺金鱗競躍淵決非明月載空船有魚不供行人買

金野日居
卷十二
莫是漁翁不愛錢

漁翁答

游魚驚餌總沉淵一任携竿晚立船
今世有錢人總愛
漁翁豈獨不貪錢

再問

魚器如何盡擁虛未應寒鬣總依蒲
終朝竟夕渾無得
莫是君釣太直無

漁翁答

渺渺澄江湛碧虛
風帆一幅掛輕蒲
吾釣豈直魚鰕設

入釣文王未解無

柳文一釣
易得文王

漁翁問

見說京糧舊日贏
學將湖舫入江撐
而今歸去應無事
蘆笋蒿芽錦鰕羹

答漁翁

茅屋無金可滿贏
湖邊小艇却堪撐
縱無介甫魚羹飯
也學東坡飽菜羹

和陳和卿四絕

絕交久是孔方兄
賒得村醪小款迎
君豈真無食肉相
夜來蔬筍太僧清

梁燕無聲畫掩扃
若為消此畫堂清
急呼覓句陳無已
莫撚吟髭且一枰

蚤裏溪人又饋魚
未容歸興動尊鱸
祇今更辦開蔬供
君若來遲釜恐無

空齋長夏永如年
鶯轉林陰鷺水田
只好更尋碁一局

莫孤花影午時天

和龔宗諭五絕

多少掄魁豈獨今
道心誰勝利名心
只知晁董前頭立
何似周程樂處尋

吾儕從仕為家邦
豈羨科名世少雙
激浪湏看歸柱立
犯顏安可畏郎撞

學不求名况為官
官甜初不似儒酸
無能富貴都磨滅
真作浮雲一樣者

聞僅二知雖賜也道傳一貫必參乎己私克盡融天理
表裏通明月在壺

名下惟知不可居誨言終日反三隅愛人以德今忠獻
莫道前賢久已無

勸學示子元夫

事業功名在讀書聖賢妙處着工夫區區只為潭潭府
不敢如韓訓阿符

亦暴有感

奕秋鴻鵠未須驚一着才差敗一枰不信但來茅屋裏
紙碁盤上着輸贏

已未秋杪敵騎雲擾聖主神斷斥逐元姦臺臣
始有抨彈之疏因成二絕一惜言者之後時
二願局面之堅凝也

牕紙暎紅枕上知破寒初聽一聲雞雖無風雨瀟瀟度
也勝隣家曉不啼

右失
曉雞

積雨霖霖忽報晴元來依舊有清明霜天護取晴宇着

莫放寒雲半點生

右喜
新晴

嘲猫

斑虎皮毛潔且新
綉裯嬌睡似親人
梁間縱鼠渾無策
門外攘雞太不仁

嘲燕

蓬蒿塞徑掩柴闌
紫燕離巢更不還
大廈連雲成就日
重遊簾幙有何顏

詠蜂

百花頭上選羣芳
收拾香腴入洞房
但得蜜成甘衆口
一身雖苦又何妨

贈電眸陳相士

巖電當年說阿戎
戎清談于世竟何功
君今雙目真如電
舉世忠邪一覽中

贈談天星數王子貴

談天客子畫敲門
相對晴牕話一樽
到底忘言方是妙
梅花枝上看乾坤

雪後同友人觀梅

簷珠瀝瀝雪初晴
酒滴寒槽雜溜聲
旋酌梅花斟夜月
人間那得箇般清

和姚權院送茉莉韻

清甚水葩淡不粧
能從盛夏到秋涼
瓊樓合着移春檻
却向山齋供淨香

雪坡集卷十二

欽定四庫全書

集部

雪坡集卷十三至
九

詳校官庶吉士臣初喬齡

主事臣呂雲棟覆勘

總校官原任中允臣王燕緒

校對官主簿臣汪日贊

謄錄監生臣姜今熙

欽定四庫全書

雪坡集卷十三

宋 姚勉 撰

詩

五言律

新晴散步

晴曉芳蹊潤幽尋得自怡
露粘行草蝶風舞冒花絲
竹靜聞鄰話林虛度客棋
意行無伴侶池上只鶯知

春日即事

行野醒春困看山立晝晴鳩啼青樾破鷺匝綠秧行物
到忘機樂人因遠俗清覓詩無斷句敲板午茶聲

山齋

茅齋住翠林一逕總清陰澗近水聲入牕虛山色侵讀
書依竹靜送客出花深此地無塵俗令人長道心

芭蕉

窻外幾芭蕉幽懷慰寂寥晚宜風颭颭秋稱雨瀟瀟清
滴漁篷碎徐翻鳳扇搖進修期似爾日日長新苗

歲暮

歲莫仍為客書空默自嗟
鴈聲催念友魚鱠起思家
廊靜風鳴葉窻虛雪入花
醉鄉聊避世天外自寒鴉

山市

路詢山市宿店近石橋橫
老水穿簷過低窻照水明
雨聲淒客思野處愜幽情
沽酒聊牽睡茅柴醉不成

舟泊蘭溪湖頭市遇雨

望燈投野市衝雨泊征船
茅店不容客柳堤聊枕舷
歌

眠濤拍枕起坐漏沾肩夜半瀟瀟歇推篷月在天

送王仲安歸武昌

武昌洲畔去端不為魚肥要起初平石同娛菜子衣夜
長秋雨急天濶白雲飛何日鵲烏喜北風鴻鴈歸

登四聖觀月桂亭有感

石刻云紹興十三年清涼居士韓世忠建

將軍休戰伐居士號清涼亭創煙蘿古山深月桂香夢
竟猶朔漠風景已錢塘往事都休問鐘聲又夕陽

登北高峯

秋風吹鬢影涼意足登山人立晴林杪猿啼霜霧間好
山多佛占浮世只僧閒我亦耽竒者禪扉日叩關

冷泉亭納涼

人間方鼎鑊个裏獨冰霜自是清難濁能令暑亦涼客
遷愁瘴海妃浴沅溫湯惟有茲泉冷冷中滋味長

放生池納涼晚歸

湖面輕煙起前山漸不分鐘聲連寺答人語隔船聞吟

客衣生月歸僧笠帶雲及城門未掩燈火已紛紛

湖上隱者所居

家計松梅竹日程琴酒碁呼猿僧到處放鶴客來時壁
上皆蘇字窻門只白詩卜鄰心已決未得買山資

病後久不到湖上晚與客到斷橋

病後久不出未知湖上秋偶逢佳客至小作斷橋遊荷
暗仍香岸柳疎猶舞樓相期明月夜更此放扁舟

次劉仲山餞歸韻

幾同湖上飲俱愛晚山青雅趣方泉寺離舟又浙亭贈
行詩自好愁別酒休醒後夜思君處桐江傍客星

富陽道中

翠駕凋零盡芒鞋響葉聲晴江潮後綠寒日竹間清曝
背翁微睡挑包僧自行離京纔一日便覺愜幽情

道傍水閣

一川澄不動山色浸分明噪晚鴉寒甚窺魚鷺瘦生人
家江閣好天下釣翁清想此幽居者何知有利名

丈室

蕭然丈室虛彷彿似僧居影與身為伴琴和鶴也無飯
時三種菜香畔一函書不似僧家處鬢髮幾幾株

贈徐處士

劍津徐處士湖海盡知名術造勾庚妙書研遁甲精寒
齋留爾久別驛若為情定赴秋風約西湖酒重傾

客中遇雨

名韉驅遠役挈挈未遑安春只雨中過花從客裏看水

聲添昨夜風力盡餘寒但喜前程濶不愁行路難

及第歸入江西界

得得還初隱秋風信馬蹄此心宸極北今日大江西戲
綵呈君賜擎珠教御題家庭真樂近尊食聽晨鷄

送梁新恩夢雷歸鄉

畫錦賦歸歟梅花萬里餘同盟難此別後會定何如袍
綠為親壽編青課弟書燕山今再有五桂耀鄉閭

梁氏
有五

桂坊

送王希聖歸興國赴舉

之子趣裝歸占黃已在眉
雕蟲觀暇日薦鷄信秋期
喜有傳衣鉢慙無助鼓旗
捷書來報我端的菊花時

贈煜上人

逸院蕭蕭竹僧中爾獨清
佛燈行道影梵磬誦經聲
露葉晨蔬熟風松晝茗烹
夜深誰伴侶月在石窻明

送趙僉判

輿輻美任二首

佐幕此三年邦人盡說賢
吏寒清夜月民暖小春天
祖

帳旗交綵歸裝石壓船甘棠在何許積粟市橋邊
底事三年裏纔膺兩薦書邦侯辨寶晚使者設羅疎知
已初何計能官自有餘漢庭今欠者子政與朱虛

與毛教授

州有典客吏以賄得官天基節乃敢立祝壽班雖
前此嘗吏之者亦不羞也而廣文毛丈獨能以而
去之充是心以立清朝必能排姦邪去不肖矣喜
而賦之詩

舉世無清濁誰歟障倒瀾獨能驅鴈鷺不使汙鷓鴣此
事雖云小其人已可觀近來義勇者欠此廣文官

次陳肩夔韻

蠻觸爭蝸角興亡土兩丘一家文到古萬世月行秋鰲
可三山冠鵬湏八極遊胷中治安策時事幾堪憂

贈廬陵三劉神童

唐時劉正字今復見廬陵珠樹三根秀金門一日登贈
君無句錦覓我到溪水不為炎涼變童年有此能

寄題上饒周儀仲西疇

聞君負北郭築室扁西疇
綠水人家曉黃雲穡事秋
吾生如有此外物更何求
堪卜東鄰否耕餘着釣舟

送胡教授之沅水任

君今鳴木鐸名與芷俱香
後夜月千里美人天一方
往追湖學躅更挈楚臣芳
了却臯比事歸來振鷺行
近聞沅水路今亦是風寒
忠信如先教邊陲儘易安
勿云師可去甘與國辭難
文武能兼盡功名更好看

有感

范張心許友餘耳面為朋世路巖於嶺交情薄似水縈
袍非舊戀結綬况同登亦莫他人責先施恐未能

夢太夫人如平生

山鹿隨麋樂林鳥反哺慈傷心惟夢裏有母似兒時愛
子平生念思親隔世悲松楸霜露冷北望淚交頤

靈源上太夫人塚

一別慈闈面春風十五花不知人有母誰念子無家社

雨鄰巢燕清明龍樹鴉動皆傷感處慟哭夕陽斜

題族子霆伯西征錄

間味西征錄霜橙嚼繪壘俊聲壓湖北詩派接江西鎮
日心相憶何時手重攜相期一樽酒重與叩雲溪

贈玉隆都監周抱一

一別丹霞洞何年到此邦犬隨燒藥鼎鶴伴改詩牕談
柄風生席清標月在江西山間欲隱來訪鹿門龐

晨興

晨興未梳盥此興亦何清看竹鉤簾坐澆花遶徑行
葛巾聊復正塵事即時生安得簞瓢足高門遂野情

贈趙神眼

杜門人事少排闥相師來童子忙驅鶴先生正看梅
煩君滕口說如我豈身媒水鏡能司馬隆中覓異才

安象祖携子餞行英爽可愛贈以詩嘉其有好
德秉彝之天必能世其家

西蜀安公子為謀不在身倚楹惟國事于道亦忠臣
偉

矣雙書藁清哉箇逸民丹心天所相宜有此麒麟

和姜明甫

詔放山林去時人冷眼者新詩為我贈高義似君難又
說同年弟尤知取友端市將梅子隱冠尚貢公彈

和葛德遠

脫兔驚竄逸潛魚畏餌逃山林聊復爾湖海可曾豪樂
笑多方誤碁嗟不着高且須隨野鹿共此食苹蒿

霧豹文雖隱風蟬蛻即僂伴書猶有劔食硯豈無田發

藻多師董思經敢笑邊晚成知大器天詔正求賢

挽十尊長居士

聘君今已矣月入少微星又失宗盟長空悲族譜亭生
芻嗟莫致歌薤若為聽只喜陰功在三槐已綠庭

又代作

鹿門龐德公款段馬少遊古人不可今君賢抑其流清
風足廉頑厚德亦鎮浮君今復古人善士吾何求

代挽甯西雲

杜牧先銘墓淵明自祭文兩賢真造理百世又逢君把
釣溪沈月著書山鎖雲誰能上遺藁堪辟木天雲

雪坡集卷十三

欽定四庫全書

雪坡集卷十四

宋 姚勉 撰

詩 七言律

元日試筆

今歲新元竅喜晴宿陰都化作清明氣從地角天涯轉
春向梅邊柳上生鷓路五更鏘劔佩虎闕半夜出弓旌
羣賢儻在新除目懽喜山中飽菜羹

元宵雨

東風已辨上元晴，入夜敲簷又雨聲。
天下更無燈可賞，雲頭應是月孤明。
遙知日甸驚回祿，未用星橋詫太平。
旅舍一枝梅在燭，照人紅影十分清。

遊曲江分韻得日字

曲江磯頭山翠崱，此景江南誇第一。
漁舟晚弄暖波間，市樓春映晴嵐出。
擁肩寒吟入圖畫，席地草飲成真率。
更叩僧房借榻眠，再上山椒約明日。

遊感山題甘露臺

講師曾此雨天花臺築山椒幾歲華一蓋雲松擎羽葆
四盤江水走龍蛇好教絕頂峻嶒出莫放濃陰蒼蔚遮
應有醍醐餘味在僧房試覓一盃茶

題西湖竹閣寺

入門纔見萬琅玕便覺玲瓏日影寒峯勢近環簷外立
湖光更好竹中看煙霞古淡僧容瘦風露清高鶴夢殘
已占兩亭涼坐足再須登閣倚欄干

千古清風白樂天昔時曾此飽談禪自從西閣無吟跡
惟有東坡嗣舊傳來往祇應湖上寺聽聞誤說海中僊
我來再拜祠堂下笑摘巖花薦井泉

瀛嶼

孤山御園
中涼坐

自是瀛洲近帝鄉孤峯宛在水中央地雄海上三山境
天與僊家六月涼雲母屏寒蒼檜色水精奩啟碧湖光
雪中來此尤須別好着珠蓑棹玉航

觀畫竹

外間盾日正相仇，忽有清風起筆頭。
坐對不知三伏熱，起行如與七賢遊。
洗空京洛塵埃氣，化作江南水石秋。
我有一溪恰如此，因君思去理扁舟。

詠金橘團

雪不能甜橘小酸，若為有此蜜水團。
比將金彈可勝軟，嚼破水精如許寒。
泉石碎聲鳴齒頰，乾坤清氣入脾肝。
京華六月塵生渴，賴爾煩襟得自寬。

思家信不至

又是秋風入芰荷尚無黃耳到如何慈親想自精神健
嬌女應添智慧多踪跡自嗟成漫浪利名底苦欲奔波
幾時了却曾中事只傍南溪理釣蓑

有懷學子

吾生傳癖更書癡俳笑紛紛獨喜隨篝火共窺韓子筆
煮茶細說杜陵詩論交無此知心友得句常于見面時
一念不教千里隔慈恩花下夢微之

有懷族子

秀出吾宗獨有君等間相別又秋新江山憔悴生歸思
風雨淒涼夢故人天境儘供分石釣雲溪擬卜住山鄰
何時對酒聽佳句洗我胸中一斛塵

贈陳栢堂道士

孤山古栢鬱蒼蒼中有高人住此堂峻入太空摩日月
清蟠勁氣挾風霜葉餐曉露通僊藥子藝宵煙謁帝香
已結歲寒方外友願分一半白雲鄉

題釣臺

等閒伸脚動天文，須信乾坤繫此身。
天上有星猶是客，漢庭何事肯為臣。
祗當泉石容真隱，安可文書役故人。
豈但雲臺高不似，釣臺草木至今春。

送陳新恩赴殿

桂花香滿月輪秋，穩送鵬程萬里遊。
身近清光瞻帝座，手攜多士上瀛洲。
戊申奏對規模濶，庚戌掄魁氣數周。
陳亮自來天下選，老年更好作龍頭。

送同憲趙章甫上舍入京

壬子春

正誼羣英自藹然喜君已是著先鞭
翼搏北海三千里
身在西籬尺五天學舍快升優褐上
酒樓莫戀軟紅邊
雙親教子相期切成取功名趁妙年

一別西湖又見春夢寬長是繞湖濱
為煩竹閣揩題墨
更向梅花道故人槐市舊遊休復問
龍門佳客尚能新
明年儻共斯庭對願過當時蔡與陳

寄鄒希聖兄弟

槐花又向此秋黃槐未黃時趁早忙
龍到水高衝浪化

鵬因風厚貼雲翔
常金鏃取霜筠健
越砥磨開電劍光
努力晨窻并夜案
天庭已動桂枝香

和郡侯勸駕韻

聖朝珍重設儒科
總總英賢入禮羅
天下豈無偕計上
日邊此獨得人多
僊橋快應龍頭識
工席忻聆燕衍歌
雅志不為溫飽計
尚期勲業等山河

晞顏欲進聖門科
何意嫦娥剪綠羅
拾紫不知如芥易
一紅也覺占春多
興賢借此雙旌重
得士歡於五袴歌

九萬扶搖風力健，穩吹槎馭上天河。

和郡侯喜雨韻

玉龍捲動海千尋，一滴天瓢水尺深。
農父帶雲耕宿潤，使君喜雨入新吟。
浪低麥隴收難速，針短秧疇插未禁。
三日頓回生意滿，天心只在我公心。

送趙判縣

崇暖

美任改除閩倅

仁如愛日潔冰壺，鞭不曾施豈用蒲。
吏服官清羞鸞獄，民憐邑窘競輸租。
甘棠舍在春常滿，行李船空月亦無。

展驥分州猶未稱合於紫禁着飛鳧

和劉月湖縣尉

不見元城不泗州令人媿汗直如流
獲瞻沂水春風點說到濂溪太極周
我豈能為前輩後君真合向古人求
攷亭一派今寥落還肯同登道閫不

用樂魁聲道寄李後林韻寄聲道

尺書春寄忽驚秋未見新除入報郵
鐵漢尚踈丞相馬玉兕肯伴秀才牛
欲令世事更新易可使時賢不進休

子職顯揚千古事，聖恩深重更龍頭。

一葉梧桐喚動秋，分投閒散亦無郵。超踰未羨詔金馬，
遲鈍不妨騎土牛。天爵賈殊人爵貴，偽心那似德心休。
讀書豈為榮身計，何必三公要黑頭。

再用前韻寄後林

別來知是幾三秋，書倩洪喬懶作郵。帛足忽傳來自鴈，
軸腰更喜大如牛。信知蓋世名非枉，吟到驚人句未休。
何日杖藜參口訣，歸來閉戶學從頭。

貞心古幹健凌秋人似淵明愧督郵覽德未能儀舜鳳
干時那肯食秦牛紋楸失着誰能整黃間同機底未休
杜若山中人窈窕白蘋風嫋楚江頭

送王新恩赴省

老泉坡穎成名了曾應君家木假山父與子偕升禮部
弟隨兄去入賢闕龍驅萬馬空如洗鳳挾雙雛逸莫攀
早早歸來榮畫錦綠衣爭映綵衣斑

送萬仲榮赴省

梅梢枯處忽東風，魁壓千花一點紅。
歡喜馬頭飛雪處，安排龍首綵雲中。
內訌外阻憂方大，東柱西撐策已窮。
試了南宮趨北闕，好輸鯁論發天聰。

送童子敬赴省

乙卯

滿望飛騰幾許年，一聞充賦喜如顛。
金經爐冶鋒方銳，木飽風霜節始堅。
此去穩登雲裏路，定知榮冠籍中僊。
近聞上蔡鸕洲合，一似前年錦水連。

送王元高兄弟東上

乙卯科

前歲親從月殿回素娥引領到瑤臺桂枝指點教先折
僊籍披陳看後來恰見拱辰名字接一如公序弟兄魁
預將消息而今報好作百花頭上梅

去去龍門客又新一鞭猛過禹濤春佇觀極論陳三策
切莫潛兵救八人沂國素無溫飽志梅溪不作諂諛臣
二難兄弟當如此及第歸來喜拜親

送羅道甫歸廬陵應舉

西風滿路桂枝香催整登雲步月裝羣輩總皆推德行

三年稔已聽文章琅琅議論須披腹瑣瑣功名只探囊
捷了早來談傑作聳聞鳴鳳瑞朝陽

送陳縣尉之太和新任

古來尉自號神僊况是棲身快閣天好向盤根施利器
如登熟路著先鞭可知豈患無知己自愛應能不愛錢
近世末僚卿相少願儲遠業繼前賢

送洪右司去官

戀陟懷遷怕去官近時君子退如難中書堂拂高風袖

神武門留太華冠此舉直堪驚醉夢斯人端是障狂瀾
先生真正平齋子凜凜清標萬古寒

寄題陳肩夔兄弟夢草堂

謝池草句本無竒千古流傳五字詩祇是可人醒枕席
許多生意在壩荒信渠風雨聽眠處快甚江山得助時
顧我此懷今已矣羨君兄弟然吟髭

寄題陳肩夔雲錦窻

八窻面面受新涼萬蓋盈盈擁靚粧倩得天孫雲杼軸

織成騷客錦衣裳
雨翻綠淨盤中玉
風攪紅嬌鏡底香
箇裏搜詩最竒絕
吐為黼黻五文章

奉題呂氏宜老堂

此堂清不着珠璣
只要雙親佚老宜
春酒儘堪眉壽介
斑衣長似乳時嬉
婦垂鶴髮陪姑緯
翁撚銀髯課子詩
飽飲菊花潭上水
鷄窠猶自拜孫枝

和豐城鄒端簡韻就送其歸

千里攜書謁帝閭
如君忠義出天根
筵筭已卜回淵聽

寸草還思報厚恩且共漁樵談帝霸豈無豪俊整乾坤
細吟窻下廬山句亦欲鄉人訪道原

批了龍鱗歸釣魚江濤帖息果天歟腰雖未印衣重綵
囊縱無金篋有書日可事劉宜令伯天教名子更僑如
本原培養非愚計遠業何妨厚自儲

題百花林書堂

書堂靜占百花林蜀錦香浮一徑陰楊柳軟風吹雨醒
海棠輕霧擁春深盈樽有酒供清醉滿眼皆詩足勝吟

冰雪相看人更好竹君梅友歲寒心

溪山堂翫月

施府判
別業

前山杳靄翠煙凝幾點踈星隔岸燈不是飛來千里月
如何照徹一壺冰天開圖畫無窮趣人在林巒竅上層
動智靜仁須有得欄干莫只等閒凭

招友人鳳山觀雪

霜風纔辨兩朝晴怪聽敲窻又雨聲一夜忽生虛室白
六花已與短簷平酒斟銷帳真成俗興盡扁舟且未清

想得鳳山高處好試來着履水精城

入京遇雪

正月
二日

馬頭雪絮舞花深便覺新陽改故陰
天上素光開玉府眼前一色是瓊林
定知洄曲師當捷且把新豐酒獨斟
萬木怯寒頭正縮梅花一點露春心

道中積雨

纔起程時雪絮春雪餘又是雨兼旬
肩輿聊復能安穩步屨其如受苦辛
楮賤米窮嘗世味風餐露宿鍊官身

一朝儻有青雲上莫忘泥耕水耨人

贈俊上人雪崖

雪崖來覓雪坡詩崖險坡平雪揔宜每羨僧房間竹折
終強俗客聽窻知巖收泉竇無聲溜石壓梅花側出枝
到了紅爐融一片須還門外尺深時

題道士碧潭

幽人何處倚漁竿百頃清潭浸碧寒不動一波疑水定
中涵萬象覺天寬山將螺髻堆銅鏡月借玻璃現玉盤

莫作窈深無底者是間應有卧龍蟠

贈朱五星

貴賤由來不自齊
巧將躔次說高低
星環雲漢胸羅列
斗挹天漿手獨提
太乙昨傳當蜀道
文昌今喜尚江西
中興氣運應從此
試問何時復聚奎

雪坡集卷十四